



Broj: 11/06-34-11211/20
Sarajevo, 30.4.2020. godina

**SVIM OSNOVNIM ŠKOLAMA
SVIM SREDNJIM ŠKOLAMA**

n/r direktora/ica

PREDMET: Upozorenje – dostavlja se

Poštovani roditelji, dragi učenici,

nastava u Kantonu Sarajevo, zbog pandemije Korona virusa i sigurnosti svih nas već drugi mjesec se odvija u online okruženju, putem platformi koje u ovom trenutku pružaju adekvatnu zamjenu za redovni nastavni proces i zamjenu za vaše učionice. Svjesni smo činjenice da nije lako biti u zatvorenom prostoru i sjediti pored računara, tableta i telefona, i ispunjavati sve obaveze koje se pred nas kao društvo i struku postavljaju u ovim vanrednim okolnostima. Međutim, iskreno se nadamo da nakon skraćanja nastave, opterećenje i nije toliko veliko, a s druge strane omogućeno je da se ispuni obim obaveza predviđenih Nastavnim planom i programom svakog pojedinog predmeta, kako se nastava ne bi nadoknađivala kasnije i kako biste uspješno završili ovu školsku godinu.

Evidentno je da ste se svi snašli u online okruženju i da sve teče svojim tokom i bez većih problema, te smo u tom pogledu ponosni na sve vas. Vi kao učenici i roditelji ispunjavate svoje obaveze koje nastavnici stavljaju pred vas, ali isto tako imajte u vidu, da su i vaši nastavnici opterećeni maksimalno, kako svojim redovnim, tako i dodatnim obavezama i edukacijama, kako bi vam osigurali najbolje uvjete za rad i olakšali ispunjavanje obaveza.

Uopće ne sumnjamo da poštujete svoje nastavnike, ali ipak imamo obavezu da vam skrenemo pažnju na vaše ponašanje za vrijeme odvijanja nastave u online okruženju.

Naime, ovih dana internetom i društvenim mrežama kruže snimci pojedinih youtubera koji se hvale kako im pojedini učenici iz regiona ustupaju svoje pristupne podatke i na taj način „upadaju nepozvani“ na pojedine časove, i ometaju rad svih učenika koji žele da nauče više, kao i rad nastavnika koji obavljaju svoj posao, a sve kako bi dobili koji „like“ i što ne reći i zaradili na nesmotrenosti učenika.

Upozoravamo da je takvo učeničko ponašanje neprihvatljivo i da je ustupanje vašeg korisničkog imena i lozinke trećim licima, pogotovo u takve svrhe, nedopustivo i neprimjereno u bilo kojoj, a posebno u ovoj situaciji kad se trudimo sačuvati naše živote.



Vaši korisnički podaci kreirani su na sigurnoj domeni svake škole i kao takvi oni su njihovo vlasništvo, a vama su ustupljeni na upotrebu cijelo vrijeme dok god ste učenik pojedine škole te ste odgovorni za njihovu upotrebu u svrhu odgoja i obrazovanja.

Skrećemo pažnju da se putem administratorskog računa jednostavno može utvrditi aktivnost svakog pojedinog učenika, jer se vaše email adrese sastoje od imena i prezimena. Također, se može utvrditi da li se sa istim korisničkim podacima pristupa sa jednog ili više uređaja, kao i da li se u isto vrijeme prijavljuje više korisnika sa istim korisničkim podacima.

Većina vas je još uvijek nije dovoljno odrasla da bi u potpunosti shvatila ozbiljne posljedice koje mogu proizaći iz ovakvih neozbiljnih postupaka. Zato molimo i upozoravamo i vaše roditelje, da sa vama porazgovaraju i običnim rječnikom koji vi razumijete, ukažu vam na ono što nesavjesni pojedinci čine.

Također, od direktora škola tražimo da u skladu sa Uputstvom o realizaciji online nastave, upoznaju roditelje sa pravilima ponašanja u online okruženju (interni akt škole), u kojem su precizirana ponašanje svih sudionika za vrijeme odvijanja online nastave, te da sa istim ponovo upoznaju sve nastavnike, učenike i roditelje, kako bi se prevenirali i spriječili ovakvi i slični nedopustivi postupci.

S poštovanjem



MINISTAR

Mr. Anis Krivić



Dostaviti:

- Naslovu
- a/a



web: <http://mon.ks.gov.ba>
e-mail: mon@mon.ks.gov.ba;
Tel: + 387 (0) 33 562-128,
Fax: + 387 (0) 33 562-218

Sarajevo, Reisa Džemaludina Čauševića 1

